

Unammilleqatigiinneq pillugu inatsisartut inatsisaanni kaaviiaartitat ilaallu ilanngullugit naatsorsorneqartarnerat pillugu Namminersorlutik Oqartussat nalunaarutaat

Unamminneqatigiinneq pillugu inatsisartut inatsisaanni (unammilleqatigiinnermut inatsit) nr. 1, 15. maj 2014-imeersumi § 7, imm. 6 aamma § 15, imm. 4 malillugu aamma Unammilleqatigiinnermut Ataatsimiititaliamit oqaaseqaaat malillugu ima aalajangiineqarpoq:

Kaaviiaartitat

§ 1. Nalunaarummi matumani "kaaviiaartitat" ima paasineqassapput, nalinginnaasumik ingerlatsinermut atatillugu akitsuutinik imaluunniit akileraarutinik, tuniniaanermi toqqaannartumik attuumassuteqartunik ilanngaareerluni kaaviiaartitat, takuulli §§ 7-9.

Imm. 2. Suliffeqarfiup peqataasup kaaviiaartitai, tak. unammilleqatigiinnermut inatsimmi § 7, imm. 1, nr. 3-mi, ukiumi kingullermi naatsorsuusiorfusumi kaaviiaartitatut naatsorsorneqassapput, takuulli §§ 7-9.

Imm. 3. Unammilleqatigiinnermut inatsimmi § 7, imm. 1, nr. 3 malillugu kaaviiaartitat, suliffeqarfiit peqataasut kaaviiaartitaasa katinnerisut naatsorsorneqassapput.

Imm. 4. Ukiup naatsorsuusiorfusup kingulliup naammassereernerata kingorna suliffeqarfiup peqataasup ataatsip arlalilluunniit suliffeqarfimmi ilaa tunisimappagu, kaaviiaartitat tamatumunnga aallaavissineqarsinnaasut, suliffeqarfiup peqataasup kaaviiaartitaanit ilanngaatineqassapput. Kaaviiaartitat pigisanut aallaavissineqarsinnaasut, taamaalilluni ukiumi naatsorsuusiorfusumi misissuineq malillugu pissarsiarineqarsimasut, suliffeqarfiup peqataasup kaaviiaartitaanut ilanngunneqassapput.

Suliffeqarfissuit kaaviiaartitaat

§ 2. Suliffeqarfiup peqataasup kaaviiaartitaanut aamma suliffeqarfinni attuumassuteqartuni kaaviiaartitat ilaapput, tak. § 3. Suliffeqarfik peqataasooq imaluunniit attuumassuteqartoq aamma tassaasinnaavoq naalagaaffik, Namminersorlutik Oqartussat, kommuneqarfik imaluunniit kommuneqarfiit ataatsimoorussa, tak. § 9.

Imm. 2. Suliffeqarfiup peqataasup kaaviiaartitaanut ilaatinneqanngillat suliffeqarfiup peqataasup suliffeqarfiillu attuumassuteqartut akornanni kaaviiaartitat imaluunniit suliffeqarfiit attuumassuteqartut akornanni kaaviiaartitat.

§ 3. Nalunaarummi matumani "suliffeqarfiit attuumassuteqartut" ima paasineqassapput:

- 1) Suliffeqarfiit piginneqataaffigineqartut. Suliffeqarfiit, piginneqatigiiffiit aktieselskabit pillugit inatsisip Kalaallit Nunaannut atuutilernerani aaqqiisummi § 2-mi taaneqartutut, suliffeqarfik peqataasoq toqqaannartumik imaluunniit toqqaannangitsumik aalajangiisumik sunniuteqarsinnaasoq.
- 2) Suliffeqarfiit piginnittuusut. Suliffeqarfiit suliffeqarfimmi peqataasumi aalajangiisumik sunniuteqarsinnaasut.
- 3) Suliffeqarfiit allat, tassani suliffeqarfik piginnittuusooq aalajangiisumik sunniuteqarsinnaasoq.
- 4) Suliffeqarfiit, tassani suliffeqarfiit arlallit, nr. 1-imit 3-mut taaneqartutut, ataatsimoorlutik aalajangiisumik sunniuteqarsinnaasut.
- 5) Suliffeqarfiit, nr. 1-imit 4-mut ilanngunneqanngikkaluarlutik, allaganngorlugu isumaqatigiinnikkut imaluunniit suliffeqarfiit maleruaqqusaani aalajangersakkat malillugit ataatsimoortunik aqutsisoqarlutik inissisimalersut imaluunniit taakkunanngaanniit aalajangiisumik sunniuteqartumik inissisimalersut, makkua tunngavigineqarpata;
 - a) suliffeqarfiit peqataasut niuerfinni qanoq iliortarnissaat pillugu ataatsimoortumik aqutsisut ataqatigiissaarpatigik, aamma
 - b) suliffeqarfiit peqataasut ataannartut ataatsimoortumik aqutsisunit aqunneqarunik, aamma
 - c) niuernermi aarlerinaatit aamma aningaasarsiornermi inernerit qanoq agguarneqartarnissaat pillugu aaqqiissuteqarunik.

§ 4. Suliffeqarfiit peqataasut marluk arlallilluunniit ataatsimoorlutik suliffeqarfimmi ataatsimi aalajangiisumik sunniuteqarpata, suliffeqarfiup pineqartup kaaviiaartitai kaaviiaartitat katinnerini ilanngunneqassapput.

Imm. 2. Imm. 1 malillugu kaaviiaartitat katinneri, suliffeqarfiit peqataasut aamma suliffeqarfiup ataatsimoortumik aqunneqartup akornanni kaaviiaartitat ilaatinneqanngillat.

Kaaviiaartitat allat

§ 5. Suliffeqarfik peqataasoq suliffeqarfinnik allanik taama assingusunik isumaqatigiissusiorsimappat, unammilleqatigiinnermut inatsimmi § 7, imm. 1 malillugu suliffeqarfiit taakku kaaviiaartitaat kaaviiaartitat katinnerini ilanngunneqassapput.

Imm. 2. Kaaviiaartitat katinneri suliffeqarfiit imm. 1-imi taaneqartut akornanni kaaviiaartitat ilaatinneqanngillat.

Branchini peqatigiiffiit aamma kattuffiit

§ 6. Branchimi peqatigiiffimmi imaluunniit kattuffimmi allami tamatumunnga nallersuussinnaasumi, tak. unamminneqatigiinneq pillugu inatsisartut inatsisaat § 7, imm. 1, nr. 3, kaaviiaartitat peqatigiiffimmut ilaasortanut ataatsimut kaaviiaartitatut naatsorsorneqassapput peqatigiiffiup nammineq kaaviiaartitaanut ilanngullugit.

Imm. 2. Imm. 1 malillugu peqatigiiffiup kaaviiaartitai peqatigiiffiup taassumalu ilaasortaasa akornanni kaaviiaartitat ilanngaatilugit naatsorsorneqassapput.

Suliffeqarfiit aningaasarsiornermik ingerlataqartut

§ 7. Selskabit sillimmasiisarfiit eqqarsaatigalugit, kaaviiaartitanut taarsiullugu ilanngaateqarnani sillimmasiineranut akiliutit nalingi ilanngunneqassapput, tassa sillimmasernissamut isumaqatigiissutit selskabinit taakkunannga pissarsiarineqarsimasut imaluunniit taakku akiligaannik imaluunniit siunissami pissarsiarineqartussaasut tamaasa ilanngullugit, tamakkununga ilanngullugit sillimmaseqqinnissamut isumaqatigiissutit avataaniilersimasut ilanngullugit, akileraarutit imaluunniit akitsuutit akileraarutitut assingusut, sillimmasernermi akiliutissatut aningaasat tunngavigalugit akileqquneqarsimasut imaluunniit sillimmasernermi katinnerit tunngavigalugit akileqquneqarsimasutut tunngaveqartut ilanngaatigereerlugit.

§ 8. Taarsigassarsisitsisarfiit imaluunniit suliffeqarfiit aningaasarsiornermik ingerlataqartut eqqarsaatigalugit kaaviiaartitanut taarsiullugu isertitat makku katinneri atorineqassapput, taamaassappallu akileraarutit imaluunniit akitsuutit akileraarutitut assingusut, isertitanut tamakkununga toqqaannartumik attuumassuteqartut ilanngaatigalugit:

- 1) Erniaatigut isertitat assigisaallu.
- 2) Aktiaatigut iluanaarutit assigisaallu aamma aningaasaqarnermi pissarsiat allat.
- 3) Sullissinermi akiliutinit isertitat tunisinermilu iluanaarutinit isertitat assigisaallu.
- 4) Pappilissat nalinginik aamma nunat allat aningaasaasa nalinginik naleqqussaarinert assigisaallu, tamakku katillugit sinneqartoorneruppata.
- 5) Isertitat nalinginnaasut allat.

Naalagaaffik, Namminersorlutik Oqartussat, kommuneqarfiit imaluunniit kommuneqarfiit ataatsimoorussa

§ 9. Naalagaaffik eqqarsaatigalugu kaaviiaartitanut taarsiullugu, ministereqarfimmut pineqartumut ukiumut kingullernut naatsorsuusiorfusumut ingerlatsinermut illuutinullu ilanngaateqarnani aningaasartuutit katinneri atorineqassapput, tak. naalagaaffiup kontoplan-iani suussusersiinerit pingaarnerit 1 aamma 3.

Imm. 2. Namminersorlutik Oqartussat eqqarsaatigalugit kaaviiaartitanut taarsiullugu, naalakkersuisoqarfimmut pineqartumut ukiumut kingullernut naatsorsuusiorfusumut ingerlatsinermut illuutinullu ilanngaateqarnani aningaasartuutit katinneri atorineqassapput, tak. suussutsinut kontut 1 aamma 7, Namminersorlutik Oqartussat naatsorsuuserineri ilitersuutaata kontulersuinerit ilitersuummi kisitsimmi 7-mi takuneqarsinnaasutut.

Imm. 3. Kommuneqarfiit imaluunniit kommuneqarfiit ataatsimoorussa eqqarsaatigalugit kaaviiaartitanut taarsiullugu ukiumut kingullermut naatsorsuusiorfusumut ingerlatsinermut illuutinullu ilanngaateqarnani aningaasartuutit katinneri atorineqassapput, tak. suussutsinut kontut 0-imit 5-imut, tak. kommuneqarfiit kontoplaniani kisitsit 7.

Kaaviiaartitat danskit koruuniinut naatsorsorneri

§ 10. Nunat allat aningaasaanni kaaviiartitat suliffeqarfiup ukiumi kingullermi naatsorsuusiorfiani nunat allat aningaasaasa nalingisa naatsorsornerini agguaqatigiissinneqarnerat malillugu danskit koruuniinut naatsorsorneqartassapput.

Kalaallit Nunaanni kaaviiartitat

§ 11. Kalaallit Nunaanni kaaviiartitanut ilaapput, tak. unammilleqatigiinnermut inatsimmi § 15, imm. 1, nioqqutissanik tunisinerit imaluunniit sullitanut kiffartuussutini tunisinerit, piffissap isumaqatigiissuteqarfiusup nalaani Kalaallit Nunaanni nalunaarsorsimasut.

Imm. 2. Taarsigassarsitsisarfiit suliffeqarfillu aningaasarsiornermik ingerlataqartut allat eqqarsaatigalugit Kalaallit Nunaanni kaaviiartitanut ilaapput, tak. § 15, imm. 1, isertitat, tak. § 8, suliffeqarfiup immikkoortortaanni imaluunniit Kalaallit Nunaanni immikkoortuini pissarsiarisaat.

Kaaviiartitat killinginik qaangiineq

§ 12. Unammilleqatigiinnermut inatsisip § 7, imm. 1, nr. 3-ani § 6, imm. 1-ani inatsisip inerteqqusiinerani ilaatitsinnginneq atuuppoq, suliffeqarfiit peqataasut ukiuni naatsorsuusiorfusuni tulleriit marluk angullugit kaaviiartitsineq taaneqartoq annerpaamik procentinik qulinik qaangeraluarpatigilluunniit.

Imm. 2. Imm. 1-imi aalajangersagaq atorneqassanngilaq, kaaviiartitsinerimut killigitaq taaneqartoq suliffeqarfimmut allamut kattussimanerata kinguneranik qaangiisimaneq pisimappat, suliffeqarfiit kattunnerat pillugu Namminersorlutik Oqartussat nalunaarutaani nassuiarneqarsimasutut.

Atuutsinneqalerfissaa

§ 13. Nalunaarut manna atuutilissaaq ulloq 15. agusti 2015.

Namminersorlutik Oqartussat, ulloq 23. juuli 2015.

Vittus Qujaukitsoq

/

Jørn Skov Nielsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut